



## Herremättli-Clique 1921

Sujet 2020

# GRHYSEL

## D Abfallsinder vom Rhybord

Vom Däängelistrand bis zue dr Dreyroose,  
gseeht me Bikini, Aidailer und Bermudahoose.  
S het aber au no ganz anderi Sache,  
wo aim vom Boode uss aalache:  
Doo e Gugge, deert e Seggli,  
e halbaagfrässes Fuudiweggli.  
e Wägwäärfgrill und e alti Däsche  
und nadyyrlig Blastigfläsche,  
dernäabe vom ene Siggspägg d Biggse,  
d Flipflops von ere junge Schiggse,  
Kaffibächer us em Teygaweylaade,  
e Smartfoon, no nass vom Baade,  
e Baryyser, exgyysi, e Kondoom,  
vom ene glungene Oobe dr Loon,  
kenntsch maine sygsch im Fraidehuus,  
wysawyy liggt e halbdooti Muus,  
allwääg het si d Räschte gfrässe,  
vom ene Tschoint, wo ain het vergässe,  
20 Minute wo niemerts me will lääse,  
e Schyssibolle vom ene unbikante Wääse,  
Syygarettespäggli mit gruusige Helge druff,  
iiberaal Stummel, s isch e riise Puff,  
Schäärbe hets zem yynedrampe,  
leeri Fyyraazinder und e Däschelampe,  
e Hogger wo isch zämmegracht,  
no ere duuregmachte Nacht,  
e Lippestift zem d Schnuure moole,  
deert liige au no haissi Koole  
und nääbe Gluet und Äsche,  
e Whisky und e Wodkafläsche,  
e Glepfer, schwarz verbrennt  
und hindedraa e Bierlyyche wo pennt,  
d Gnocheräschte vom ene gfrässne Giggel,  
waiss Gott wohäär, e grumme Biggel,  
lechrigi Sogge und alti Schlappe,  
e sälbergschdriggdi Wullekappe,  
e Luftmadratze ooni Luft,  
die isch nämmlig scho verpufft,  
e Drooteesel, au mit eme Blatte,  
druff hoggt säälilig e groossi Ratte,  
d Schachtle wysawyy,  
isch von ere Pizza Naapoli,  
Schwoobekääfer noch und necher,  
wuusele us allne Lecher,  
d Aamaise findes au ganz toll  
und schleen sich schnäll dr Ranze voll.

Me kennt no vyyl uffzelle,  
wenn me mechti welle.....

S Resümee:

Worum dr Abfall no ummeschleppe,  
die blaue Kiibel sin ebbis fir Deppe.  
Mir leens, wo s grad isch lo liige  
und hänn unsere innere Friide.  
Ebber ruumts denn scho ewägg,  
s isch jo numme e weeneli Drägg.  
Speetschtens morn isch nyt me doo  
und mir kenne vo vooorne aafoo.  
Bäarge baue isch sauglatt,  
eerscht rächt in dr scheene Stadt.  
D Stroossewischer mien ebbis ha zem Schaffe,  
mir sin jo kaini asoziaale Affe!

---

*Me bsuecht d'Waage- und Reggwysyte-Uusstellig bi dr Kasäärne  
und d' Laddärne-Uusstellig uff em Minschterplatz.*

*Sy steen deert vom Määntig znacht bis am Mittwoch demoorge.*